

"Te Whakarewatanga o te Paetukutuku Kōrero Māori"

nā Juanita Teepa nō Ngāi Tūhoe me Ngā Puhi.

Ko Lana Simmons-Donaldson e whakaatu ana i te paetukutuku Kōrero Māori i te pō whakanui i ngā mahi o Te Wiki Reo Māori.



Ko Kōrero Māori te ingoa o tētahi hōtaka pārongo hōu e whakahaerehia ana e Te Taura Whiri i te Reo Māori. I ahu mai tēnei i te kirimana i waenga i Te Puni Kōkiri me Te Taura Whiri hei whakatairanga i te whakamahinga o te reo Māori, hei whakapiki mōhio hoki ki te reo Māori i Aotearoa. Me kī, ko Te Taura Whiri i te Reo Māori te māngai whakaputa i te hōtaka nei.

Ko tētahi o ngā kaupapa i whiriwhirihia, ko te hanga i tētahi paetukutuku tauwhiti. I ahu mai te whakaaro nei i te mōhio kei te rahi haere ngā kaiwhakamahi ipurangi, ā, me te mōhio anō hoki, ka taea e te paetukutuku tauwhiti te whakaputa rauemi hei whakaako i te reo Māori ki te ao whānui.

Ka noho te paetukutuku tauwhiti nei, arā, ko Kōrero Māori anō tōna ingoa, hei papakāinga, hei tautoko i te hunga e hiahia ana ki te kōrero Māori, ki te ako rānei i ōna āhuatanga maha katoa. Mā te hunga akoako, mā te hunga kōrero, mā ngā pakihi, mā te hunga ihu roa anō hoki tēnei hōtaka.

I tēnei wā kei te hanga tauira ā-taringa, tauira ā-kanohi ngā kaimahi

o te paetukutuku nei, arā, ko ngā rārangi kōrero, ko ngā rārangi kupu, ko te whakahua tika i te reo Māori, me ērā momo āhuatanga katoa e taea te ako te reo Māori ki te hunga e hiahia ana. Kua whakaritea te whakatū i tētahi whārangi wānanga, ki reira kōrero ai, tautohetohe ai, whakawhiti whakaaro ai i runga i ngā kaupapa, i runga i ngā āhuatanga e pā ana ki te ao Māori, ki te reo Māori hoki. He wāhi anō hei whakaharatau i tō reo Māori kua akohia nei e koe mai i tēnei paetukutuku, mai i ētahi atu wāhi ako i te reo Māori rānei.

I whakarewahia tēnei paetukutuku tauwhiti e te Minita Mō Ngā Take Māori, rāua ko te Kaiwhakarite Tūmahi, arā, a Lana Simmons-Donaldson, i te pō whakanui i ngā mahi mō Te Wiki o te Reo Māori i Te Whanganui-a-Tara.

Ko te tūmanako o Te Taura Whiri i te Reo Māori kia ū tēnei kaupapa ki tō mātou putanga matua, arā, "Kia ora te reo Māori hei reo matua, hei reo kōrero mō Aotearoa", ā, hei whakatutuki, hei tiaki hoki i ā mātou mātāpono, arā:

Rangatiratanga

He awhi i te iwi Māori ki te whakaū i te reo Māori kia puāwai

Hiranga

He whakaū me te whakapiki tonu i te hiranga me te tohungatanga o te reo Māori

Wairua Auaha

Mā te whānui o te kōrerotia o te reo Māori, ka puāwai ngā āhuatanga o te ao hōu

Manaakitanga

Whāia kia ngākaunui mai te motu ki te reo rangatira

Whakapūmautanga

Poipoia kia pūmau te reo tuku iho

Ngā Rohe Reo

Kia maha ake ngā wāhi e kōrerotia ana te reo Māori

Nō reira e te iwi Māori, kia kaha, kia māia, kia manawanui, ā, tēnā, Kōrero Māori.

Me tiro atu ki te paetukutuku nei, ki www.koreromaori.co.nz